

কি হবে গতি, বিশ্বপতি,
শান্তি কোথা আছে—
তোমারে দাও, আশা পূরাও,
তুমি এস কাছে ॥

সংসারেতে চারিধার করিয়াছে অঙ্গকার,
নয়নে তোমার জ্যোতি অধিক ফুটেচে তাই ।
চৌদিকে বিষাদ-ঘোরে ঘেরিয়া ফেলেচে মোরে,
তোমার আনন্দ-মুখ হৃদয়ে দেখিতে পাই ॥
ফেলিয়া শোকের ছায়া মৃত্যু ফিরে পায় পায়,
যতনের ধন যত কেড়ে কেড়ে নিয়ে যায় ;—
তবু সে মৃত্যুর মাঝে অনৃত মূর্তি রাজে,
মৃত্যুশোক পরিহরি ওই মুখপানে চাই ॥

হৃদয়-নন্দন-বনে নিভৃত এ নিকেতনে
এস হে আনন্দময়, এস চির-সুন্দর ॥
দেখাও তব প্রেমমুখ, পাসরি সর্ব্ব দুখ,
বিরহ-কাতর তপ্ত চিত্তমাঝে বিহর ॥

গান

শুভদিন শুভরজনী আন আন এ জীবনে
ব্যর্থ এ নর-জনম সফল কর প্রিয়তম ;
মধুর চিরসঙ্গীতে ধ্বনিত কর অন্তর,
ঝরিবে জীবনে মনে দিবানিশা সূধা-নিঝর

হৃদয়-বেদনা বহিয়া প্রভু, এসেচি তব দ্বারে ॥
তুমি অন্তর্যামী হৃদয়স্বামী, সকল জানিছ হে—
যত দুঃখ লাজ দারিদ্র্য সঙ্কট আর জানাইব কারে ॥
অপরাধ কত করেচি নাথ, মোহ-পাশে পড়ে' ;
তুমি ছাড়া প্রভু, মার্জনা কেত করিবে না সংসারে ॥
সব বাসনা দিব বিসর্জন তোমার প্রেম-পাথারে ;
সব বিরহ বিচ্ছেদ ভুলিব, তব মিলন-অমৃত ধারে ॥
আর আপন ভাবনা পারি না ভাবিতে, তুমি লহ মোর ভার ;
পরিশ্রান্ত জনে প্রভু, ল'য়ে যাও সংসার-সাগরপারে ॥

আমার সত্য মিথ্যা সকলি ভুলায়ে দাও
আমায় আনন্দে ভাসাও ॥
না চাহি তর্ক না চাহি মুক্তি,
না জানি বন্ধ না জানি যুক্তি,
তোমার বিশ্বব্যাপিনী ইচ্ছা আমার অন্তরে জাগাও ॥